

1 Timoteo

Kiwi oo icac hénia zéma mériaŋ ac.

1 ¹Aŋgén titi miŋina Anutu zéma niŋkumunina Kristo Yesuac zézé seli ac niŋac Kristo Yesuac Méliméli ic wawaŋa ni Paulonén ²ninzén ninzén qeriaiguc naŋ téŋgérna waŋec Timoteo guac muru kiwi yomi oma haiwa hazac. Anutu maŋgoc zéma Miŋ Kewunina Kristo Yesuac murunec ewa hia zéma wésé niniŋ zéma luaenén guac muru hema kecmac.

Pakeŋ ac ikorawac goro ac.

³Ni Makedonia baeciguc keŋi nalé imuaru Efeso ama areŋa yandaiguc waima kecbésémaŋ niŋac zénaŋgé géŋi imi, gi ic embac tosara zéseli énécmima pakeŋ ac ikora tosara ménda ku énécmima ⁴nemu suruc zéma hicŋisaiaac qac areŋa imuhucyawac niŋkoro ménda wammuc niŋ imuhuc waŋi. Ac imuhucyanén Anutuac ai areŋa ninzén ninzén qeriaiguc hezac imi ménda meselimac, néŋ néwécgeŋa zééŋ zéma mihicŋianzac. ⁵Pakeŋ ac imuac héla imi goi héihéi imi mia, waŋu goi héihéi iminén ewa qeri qala qala zéma niŋtegiac qinŋtegiac hiabia zéma ninzén ninzén solaŋa imuacnec hicŋihicŋiya. ⁶Ic embac tosara ieneŋ imi sigima ac eŋomia imuaru qizizigéma keŋanŋu. ⁷Ieneŋ hénia acac kiwi ic wambiŋ zé waŋ énécmianzac, néŋ eŋaŋ ac me héipuc ac zéanŋu imuac hénia acguc ménda niŋasarianŋu.

⁸Waŋu nini yomuhuc niŋanŋiŋ, ic embac méŋnéŋ méŋ hénia ac imi hénia dindiŋacnec méndacmaciguc hénia ac imi hiabia wanŋac. ⁹Hénia ac imi ic solaŋa ionac niŋac ménda hezac, néŋ ic embac tosara yomuhucyawac hezac, hénia ac logianŋu, acqeŋe waŋanŋu, Anutuac eeya ménda héianŋu, késpedes waŋanŋu, ménda météré amuma kecanŋu, kaiŋiliweŋ waŋanŋu, neŋgoc hécgina me maŋgoc hécgina unuhumuanŋu, ic embac ionac kekecgina unuhumuanŋu, ¹⁰kaisero waŋanŋu, icnéŋnec ic alayaguc me embacnéŋnec embac alayaguc sero ai meanŋu, ic embac iwawai ésécnec soukiwa niŋac haianŋu me meanŋu, ikoc waŋanŋu, ikoc wamma héipuc ac zéanŋu, zéma haka méŋac méŋ pakeŋ ac dindiŋa imuac qacqotikicya waŋanŋu imuhucya. ¹¹Waŋu pakeŋ ac iminén mériaŋ

miņina Anutunéj énézémanj niņac qutunģé néņec buņa suruc hiabia edamuyaguc imuac mia méndaczac.

**Anutunéj ewa hiawac Paulo
goiya héiyec.**

¹²Nuac mia ai ic keņhéi hahéiya qahac zénemma ai buņa qeņeņec imuac niņac ni kuc mihicņi néņec Miņ Kewu Kristo Yesuwac ewa hia ac ézézua. ¹³Ni becneć imi miņ kewu mema titi wammima ai ichéra ununesi waņ énécmima zébiri qébiri wammima kerī. Néj ni ménda ninzéņģéma hénia ménda niņasarima imuhuc waņi, imuac niņ inéj kileņ wésé niniņ waņ néņec. ¹⁴Miņ Kewuninawac ewa hia imi ninzéņ ninzéņnina zéma goi héihéi Kristo Yesuac qeriaiguc hezac imiguc momacneć qacnaiguc qocģénéņu kuaya qeqeya hezac. ¹⁵Ic embac moczoņ yandanéj aņģéj timuac séc ackuazéc yominéj héla wanzac. Zéyecneņ; Kristo Yesunéj kępésic ic aņģéņgina tiénécmimaņ zé baeciguc mayec. Waņu kępésic ic ionac suginaiguc neņ imi tosara onogicma ic biria wanzua. ¹⁶Waņu Yesu Kristonéj nalé horua kępésicna bisiqatéj wannéņec haka iminéj biaņguc Miņ Kewunina ninzéņģéma kekeć hémběnaņa memu ionac muru séséc wammac niņac ni imuhuc wésé niniņ waņ néņec. ¹⁷Ic kewu hémběnaņa, ménda houhouya, kicninanéj ménda héhéņa, Anutu momacguc sac kekera, iwac muru ee héihéi zéma edamuyanéj nalé tetcgia qahac hema kecmac. Hélaćneć!

¹⁸Naņa Timoteo ni ac pakeņ yominéj zéseli gęnzua. Becneć kugéņi biaņac ara imi méndacma ackuazéc iminéj yaré ic éséćneć haka hiabiawac yaré qema kecbésémaņ. ¹⁹Ninzéņ ninzéņ zéma ewa kėtiņkėtiņ késa kecbésémaņ. Tosara eneņ ewa kėtiņkėtiņ imi qetaligic qahac waņu ninzéņ ninzéņgina imi konduņ zéic éséćneć zéņģédareć. ²⁰Ic imuhucya ionac suginaiguc Humeneo zéma Aleksande keczaoc. Iri imi kitiwa mema zébiri qébiri ménda wammaoc niņac Biria miņinawac mériaiguc waiérecmiyi.

Zéwelec welećac hénia.

2 ¹Imuac ac walac zéma zénaņģé gémmaņ zé wanzua imi yomuhuc; Ic embac moczoņ yanda ionac wamma zéwelec weleć zéma zéqesiqesi zéma miņ suc wamma zé weleć weleć zéma ewa hia ac wammima ²ic kewuya kewuya zéma tatać eņeņa késa kekera moczoņ ionac imuhuc wammu. Imi mia nini Anutu mepésima haka eeyaguc bęnzéj luaeiguc kecbiņ niņac. ³Haka imi hiabia, waņu aņģéj titi miņina Anutu séģiséģi mihicņi mimacac séc wanzac. ⁴Anutu imi ic embac moczoņ aņģéņgina tiyu keremma ackuazéc héla niņasarimu niņac waņanzac. ⁵Anutu imi momacguc sac keczac. Waņu Anutu zéma ic embac sucninaiguc ic miņ sucnina acguc momacguc keczac. Inéj mia hélaćneć ic wamma baeciguc

kerec Kristo Yesu mianéŋ. ⁶Inéŋ ic embac moczoŋ neŋaŋ niŋac wamma eŋeya kekecyā mulu meme buŋawac hai nénécmiyec. Haka imi naléya niŋu heyec imuaru hiŋŋiyec. ⁷Imuac mia ni ackuazéc zéauau ic zéma Yesuac Méliméli ic kumu néŋu, ac yomi hélac, ikoc qahac. Ninzéŋ ninzéŋ zéma ackuazéc héla imuac qeriaiguc ni baera baera ic embac ionac kiwi ic waŋi.

⁸Imuac niŋac ama séc ic eneŋ qeri biric qahac, zéqeŋetali qahac, méragina téréya meemma zéwelec ai memu niŋac wanŋua. ⁹Waŋu imuhucyanec embac eneŋ acguc séwi usugina imi hénaoriŋ kekecginawac sécyāiguc meamuma hémbéŋgina héima kecgic inicgic sécgémac. Néŋ oruc zucgina hiabianec miŋicmiŋic zéma goli me hoc boŋa eŋeŋa zéma séwi usu boŋa eŋeŋa ménda haimu. ¹⁰Waŋu haka hiabia wamma Anutu eeya héimimía séciguc kecanŋu imuac héniagina mewininimu. ¹¹Embac méŋnéŋ méŋ moczoŋnec niŋtoho wamma bénzéŋnec niniŋ ai mema kuamumu. ¹²Embac méŋnéŋ pakeŋ ac ic méŋac ézémac me icya miŋ maŋgoc waŋ mimacac niŋac oaec ménda zémizua. Inéŋ ara qaiyu kecmac. ¹³Adam walac mihiŋŋi mimaguc Ewa mihiŋŋi miyec imuac mia imuhuc zézua. ¹⁴Waŋu Adamwac ikoc ménda wammiyec, néŋ embacac ikoc wammiyu képésic mihiŋŋiyec. ¹⁵Waŋu embac eneŋ séciguc kecma ninzéŋ ninzéŋ zéma goi héihéiiguc météré amuma kecma héri haima merac mihiŋŋiyu aŋgéŋ titi mihiŋŋi mimia wammac.

Qeria galeŋ zéma méra baoc ic.

3 ¹Ac yominéŋ héla wanŋac. Méŋnéŋ héŋgaleŋ ai imuac ewayanéŋ niŋkumu wanŋaciguc qerianéŋ ai hiabiawac memaŋ zé niŋanŋac. ²Imuac niŋac héŋgaleŋ icnéŋ aciguc ménda opocopora wamma iniŋa momacgucac euya wammima qerinéŋ séwiac siŋ sigi kecma niŋteŋic qinŋteŋicyaguc haka eeyaguc wamma ic tosara onac goigina héima pakeŋ ac hiabianec ku énécmima ³doku seli sasala ménda nema biŋ qeŋeyawac ménda efima qeri bénzéŋac kecma zéqeŋetali ménda wamma soukiwa hinac niŋac hémbaoc ménda wamma kecmac. ⁴Waŋu inéŋ eŋeya iniŋ merahéra hiabianec galeŋgé énécmiyu nambérac héra ieneŋ iwac eeya séciguc héimima niŋtoho wammimuac hezac. ⁵(Ic méŋnéŋ méŋ eŋeya iniŋ merahéra hiabianec ménda galeŋgé énécmima némaciguc Anutuac hénaoriŋ hia galeŋgé énécmimac?) ⁶Ewa qeri meleŋuguc nalé ménda horugizac ic imuhucyanéŋ galeŋ ménda kecmac. Séwi eŋeŋ waŋu Biria miŋjina zétecgé miyec gésigési ac imuhucyawac mihiŋŋiwac niŋac. ⁷Séŋgaŋgeŋ ic ieneŋ acguc nimmigic sécgéanŋac ic imuhucyanéŋ héŋgaleŋ ai ic kecmac. Qahac waŋu zébiri qébiri zéma Biria miŋjinawac bétaciguc hiŋgacma héiwac niŋac.

⁸Méra baoc ic acguc imuhucyanec eeginaguc kecma ezelaŋgina kalé kalé ménda kecma doku seli sasala nezéléléŋ ménda wamma ikoc

wamma soukiwa memañ zé hémbaoc ménda wamma ⁹Ewa kétéñkétin qala qalagia zéma ninzén ninzénja ewa qeriaiguc téngéyu heheya imuhucya késa kecmacac hezac. ¹⁰Wañu walac ala batuc wañ énécimima inicgic héniaquina solañ qeqe wañu méra baoc ai ic onopocgic welen qeénécmimu. ¹¹Inihécgina imuhucyanec eeginaguc kecma zébiri qébiri ménda wamma qerinén séwiac sij sigi kecma ai hénia hénia kuñqañ qahac wandacmu. ¹²Méra baoc ai icnéñ embac momacgucac euya wamma nambérac héra zéma ama tacyachéra hiabianec galenagé énécimiac. ¹³Méra baoc ai hiabianec wandacgic ieney nananquina hiabia mihicñima ninzén ninzénjina Yesuac wamma késa keczu imi zénéñ hirihiri qahac zéau énécimimu.

**Buñ suruc hiabia imuac
hénia sañ.**

¹⁴Ni guaru foc hamañ zé ninzua, néñ kileñ kiwi yomi ogénzua. ¹⁵Kecba nalé horugiyu geñ Anutuac amaiguc haka dimuhuc wambésémañ imi niñ asariwésémañ niñac ac yomi zézua. Ama imi Anutu kic qeli kekera iwac héihéré énécimimia zéma ac hélawac tandéya zéma qambaña wanzac. ¹⁶Héna téréya yomuac hénia sasañgia imi qeyu hiñgac hiñgara wanzac. Imuac ewa éréhéc ménda wanzua. I imi séwiiguc hicñitegirec. Wañu Uña téréyanén hénia solaña imi zéhicñiyu kua meme uña eney héñgic. Wañu baera baera zésaigic ic enia eney ninzénagé migic. Wañu meyacmiyu ou emma eebipiyaguc kecanzac.

Kiwi ic ikora.

4 ¹Wañu uña téréyanén yomuhuc pitiri zéasariyec; Bianguc tosara eney ninzén ninzén imi waimu. Wañu uña biria ionac ikoc ac zéma kuwi ionac pakeñ ac méndacmu. ²Pakeñ ac imuhucya imi kiciguc welen qeqe ic ewa kétéñ kétéñgina gericnéñ oqeyu ikoc ac wañanzu ionac murunec haanzac. ³Ieney imi ic me embac ménda mema qaré kecmu. Wañu nene imuhucya imuhucya ménda nema imuac sigi kecmu. Néñ nene imi Anutunén ninzén ninzén ic zéma ac héla ninzu eney ewa hia nimma mema nemu niñac zéyu hicñidarec. ⁴Iwawai Anutunén zéyu hicñiyec imi moczoñ hiabia. Imuac niñac ewa hia ézéma késanec wañanzñiguc méñac méñ qeqetaliya ménda hezac. ⁵Anutuac ackuazéc zéma zéwelecninanén météré mimia wanzac imuac niñac imuhuc zézua.^a

⁶Geñ ac iminén dacmuna hécnina measari énécimima Kristo Yesuac ai ic hiabia wambésémañ. Wañu geñ méndacanzañ ninzén ninzénac ackuazéc héla zéma pakeñ ac hiabia iminén qeri uñaga meyandi wañgémmac. ⁷Héré embac neñgiawac ac enjomia zéma nemu suruc imi

^a 4:5 Mat 15:11, Mrk 7:18,19, 1Ko 10:31

andé qema Anutu eeya héimima kecman zé meefiefi ai mewésémanj. ⁸Séwiac meefiefi ai imi komodia nanjé gémmac, néj Anutu eeya héimima kekec iminéj wawaj memega sasala nanjégéjtu kekecga deguc keczan imuac qeriaiguc zéma kekec hémbénaŋaga bianguc hahaya imuac qeriaiguc momacnec sisipac acwac buŋa hegémmac. ⁹Ac imi hélacnec waju momac yanda nimma késa kekerawac séc eeyaguc wanzac. ¹⁰Waju neŋaj Anutu, kicqeli kekera, iwac muru niŋkumunina haini hezac imuac niŋac héla imuac mia neŋaj kucnina moczoŋnec ai meanziŋ. Waju inéj momac yanda neŋaj aŋgéj titi miŋina keczac, néj ninzéj ninzéj ic neŋaj imi muŋguc yanda meemma aŋgéŋnina tianzac.

¹¹Ac yomi zéseli énécmima ku énécmima. ¹²Gi sac qeli keczan imuac niŋac méjnéj méj guac niŋgic mamaya wambac niŋac. Imuac galenjé amuma guac ac zéma wawaj meme zéma ninzéj ninzéjga zéma niŋkumuga solaŋaiguc ninzéj ninzéj ic tosara ionac kicginaiguc séséc hiabia wambésémanj. ¹³Ewa qeriga moczoŋnec ackuazéc oloj énécmima zénanjé énécmima ku énécmima kecnanec ni hamanj. ¹⁴Qeria galenj ienej Uŋa téréyawac murunec ac zéhicŋima méragina orucgaiguc haima mérianj ac zégic imuac héla ewa hiawac géjgéŋa iminéj sohowac niŋac, imuac niŋna mamaya ménda wammac. ¹⁵Waju ai hénia hénia imuhucyaiguc ewa qeriga zéma kucga moczoŋnec ai mena yandima keŋu héndacmu. ¹⁶Gi geŋga zéma pakej aigawac hiabianec galenjéma zéjgé toroya qahac imuhuc wammanec kecbésémanj. Imuhuc wambésémanjiguc, gi aŋgéj titi geŋga mihicŋi amuma ic embac ackuazéc imuac gezac qema niŋanzu ionac momacnec mihicŋi énécmiwésémanj.

Welenj qeqe ai imuac ai ara.

5 ¹Ic neŋgia ac geriwiguc ménda wammiwésémanj, néj niŋna maŋgocga ésécnec waju bénzéjŋnec zénanjé waj miwésémanj. Merac sac qeli méŋac imi munaga ésécnec qacguc wammiwésémanj. ²Waju embac yanda imi neŋgocgawac séciguc, embac sac qeli imi nauŋgawac séciguc nimma inicbaoc ménda wamma qeri solaŋanec waju énécmiwésémanj.

³Waju embac malé téjgéj imuac eegina héiwésémanj. ⁴Embac malé méj nambérac me esahéra kecmizuiguc énézégic ienej walac neŋgoc maŋgocgina zéma awu asagina ionac goi héihéi imuac tasé ku énécmima amginaiguc sactasé hécgina goigina héima haka imuhucya niŋarej wammu. Haka imuhucyanéj Anutu ségiségi mihicŋi mianzac. ⁵Embac malé héla imi eŋeyanec sukusisi wamma kecaŋzaciguc Anutuaru niŋkumu kumuya haima siŋi kaiwe séc zéjgé toroya qahac zéwelec ai memac. ⁶Embac malé méj séwiac siŋa sac méndacma wajuŋzaciguc i imi qeliqeli néj humumia tanec keczac. ⁷Ac imi acguc énézéna tohoma kecmu, eŋ imuhucyanec kecma ac mihicŋiwu niŋac. ⁸Méjnéj méj sactasé héra me imuacnec toroqema iniŋ

merachéra ménda inicgaleŋ wammaciguc ic imi ninzéhŋ ninzéhŋ andé qema ic enia onogicma ic biria keczac. ⁹Embac malé ic momacguc sac mema kerecac deguc 60 bawaiguc ménda keczac imuhucyawac sac, qara newahaleŋ wawaŋawac kiwiiguc haimimiawac hezac. ¹⁰Waŋu nambérac héra hiabianec galeŋgé énécmianzac me ic kiaŋ goigina héianzac me ai ic téréya weleŋ qéénécmianzac me helanzi énécmigic yéwéri ginaguc kecanzu ionac méra énécmima haka hiabia hénia hénia wamma memaŋ niŋac kekecy a qutuŋgé amuma keru héipuc wamma héŋanzuiguc imuhuc wammimu. ¹¹Embac malé sac qeli imi qetali énécmima kiwi imuaru qacgina ménda omu. Imuhucya imi séwiac siŋnéŋ héré énécmiyu Kristo andé qemu nalé imuaru ic mewiaŋac zé wammu. ¹²Imuhuc wamma ninzéhŋ ninzéhŋ walac késagic imi timbecgéma gésigési acac buŋa wanzu. ¹³Imuacnec toroqema ieneŋ qéizéhŋ wamma kecma mézétiti haka imi niŋareŋgéma aŋgétima ama areŋ séc lelecgéma embac eŋomia kecma ac nenesicya lisi sicsaoc olomma kemma ac ménda zézéyawac séc zéanzu. ¹⁴Imuac embac qawéc sacqeli ionac imi yomuhuc wammu niŋac wanzua. Ieneŋ ic muŋguc mema nambérac mihicŋi énécmima eŋeya amaya galeŋgéma kecgic hazéc miŋina zébiri qébiri ac waŋ nénécmimaŋ zé titiŋa méŋ ménda mihicŋimac. ¹⁵Embac qawéc tosara ieneŋ bec Biria miŋina méndacbiŋ zéma liliŋgéma keŋgic. ¹⁶Ninzéhŋ ninzéhŋ ic méŋac sac taséhéra sugginaiguc embac malé méŋ keczaciguc ninzéhŋ ninzéhŋ ic eŋeyaoc embac imi galeŋgé miyu hénaroiŋ qutulaniŋinanéhŋ yéwéri imi ménda bisima embac qawéc maqeqeya imi ionac méra énécmimuac séc wammac.

¹⁷Galeŋ tosara hiabianec galeŋgé énécmianzu ionac imi séc méŋ eegina héi énécmima imuacnec buŋa suruc hiabia imuac zézé ic zéma kiwi ic ionac imi ogicma eegina héimu. ¹⁸Kiwi téréyaiguc yomuhuc zézéya, burumakao iwa méŋnéŋ padi gocmia tiziŋama séwéla qétiyu kuayaiguc ufi ménda haiwésémaŋ. Imuac niŋac ai icnéŋ ai boŋa memacac hezac. ¹⁹Galeŋ méŋac ara imi héipuc ic éréhéc me haréwéc qahac waŋu ménda nimmima aciguc ménda opocmu. ²⁰Ic embac kápésic mihicŋianzu imi ic embac momac yanda ionac kicginaiguc zémindiŋi énécmigic tosia eneŋ haka imi hémma nimma bac yandi yandi wammu. ²¹Ni pakeŋ ac imi keŋkésa hakésaya qahac mema geŋga ewaga ménda méndacma dindiŋanec tohowésémaŋ niŋac Anutu zéma Yesu Kristo iwac kiwaiguc zéma kua meme uŋa énépésiyu keczu ionac kicginaiguc zéseli génzua. ²²Gi buŋa suruc hiabia imuac ai énécmimaŋ zé ic eŋomia focdac méraga ménda hai énécmiwésémaŋ. Waŋu ic tosara kápésic waŋgic ménda toroqe énécmiwésémaŋ. Waŋu geŋga météré amuma solaŋanec kecbésémaŋ. ²³Gi hafi zepa toroqe toroqeunec waŋanŋaŋ imuac niŋ tomeŋgawac doku sac ménda nema waiŋ doku efefiadac momacnec newésémaŋ.

²⁴Kápésic tosara imi ic ionac wéséginaiguc winiŋu hicŋi tegiru bénzéhŋnec hémma niŋgésianziŋ, néŋ kápésic tosara imi andéginaiguc

méndacma haanzac. ²⁵Imuhucyanec haka hiabia acguc winiŋu hicŋianzac. Waŋu tosara hiabia qahac imi acguc musaŋgémuac séc qahac.

6 ¹Weleŋ qeŋe ic miŋhécgina ionac méra bawu keczu imi, ionac miŋhécgina nalé séc ee héihéi waŋ énécmimuac hezac imi nimma kecmu. Anutuac qac buŋa zéma pakeŋ acyawac zébiri qébiri hicŋiwac niŋac. ²Ninzéŋ ninzéŋ miŋhéc ginaguc keczu imi eneŋ ninzéŋ ninzéŋ dacmuna kecziŋ zéma ionac niŋgic mamaya ménda wammac, néŋ énézéna ogicma weleŋ qeŋe hiabianec waŋ énécmimu. Imi mia aigina imuac héla imi ninzéŋ ninzéŋ ic, Anutuac siŋniŋ waŋ énécmimia ieneŋ eŋaoc késamu imuac mia imuhuc zézua. Gi imi héna yomi ku énécmima zénaŋgé énécmiwésémaŋ.

Sokiwawac ninŋ siŋsiŋ.

³Méŋnéŋ méŋ pakeŋ ac méŋ ku énécmima Miŋ Kewunina Yesu Kristoac ackuazéac solaŋa zéma héna eeyaguc imuac pakeŋ ac Anutunéŋ niŋu sécgéanzac imuhucyawac ewa momac ménda wammac imi, ⁴Inéŋ séwi eŋeŋ wamma hénia méŋ ménda niŋ asarima hazéc ac zéma zé qeŋetali acwac nimbaoc waŋanzac. Waŋu imuacnec mia nimbupuc zéma euqaqac zéma zébiri qébiri zéma ewa éréhéc biria hicŋianzac. ⁵Waŋu ewa qerigina houyu ac héla sohoyu héna eeyaguc imuac niŋgic sokiwa memeac héna tanec waŋanzac imi ionac murunec zéŋeŋetali ac hicŋianzac. ⁶Waŋu niŋgic ewagina hiaruyu héna eeyaguc iminéŋ kunéŋ yanda naŋgé énécmimac. ⁷Neŋaŋ baeciguc iwawainina méŋ ménda mema hayiŋ, imuac kambiŋ zéma imuhucyanec méra eŋnec kambiŋ. ⁸Imuac iwawai neneya zéma séwi usunina he nénécmizaciguc niŋni sécgémac. ⁹Hinac yandaguc wambiŋ zé wanzu imi eneŋ manam batuc zéma bétac zéma haka sicsaocya hénia hénia zéma séwi siŋ biriaiguc maunumac. Haka imuhucya iminéŋ ic embac héré énécmima mebiria énécmimac. ¹⁰Soukiwa niŋac siŋniŋ wammimia imi haka biria hénia héniawac zalia wanzac. Imuac niŋac imuac waŋanzu i mesoho énécmiyu ieneŋ ninzéŋ ninzéŋgina waima rouc wamma keŋha waŋgic ewa gorogina sasalanéŋ qeriginaiguc kumuyu biridaczu.

Paulonéŋ Timoteoac pakeŋ ac wammiyec.

¹¹Imuac Anutuac ic gi iwawai imuhucyawac néŋgacma kemma haka solaŋa zéma wawaŋ meme eeyaguc zéma ninzéŋ ninzéŋ zéma goi héihéi zéma bisiqatéŋ zéma qeri bénzéŋ imuhucyawac méndacma kembésémaŋ. ¹²Imuac gi imi ninzéŋ ninzéŋac yaré hiabia imuac qema kecbésémaŋ. Yaré hiabia qema kekec hémbénaŋa aŋgéŋ tiwésémaŋ. Hénia imuac mia gi guruyu héipuc ic sasala ionac kicginaiguc ninzéŋ ninzéŋga hiabia énézéneŋ. ¹³Iwawai momac yanda kekec mihiŋi énécmianzac Anutu iwac kiwaiguc zéma Pilatoac muru ninzéŋ ninzéŋ

ac hiabia zéau énécmiyec Yesu Kristo iwac kiwaiguc zéseli génzua. ¹⁴Gi zézé seli ac yomi niŋ tohoma solañanec zéqindiŋi ac ménj ménda mihicŋima kecnanec Miŋ Kewunina Yesu Kristonéŋ wininimac. ¹⁵Nalé zéyec imi ducŋiyu Anutunéŋ mewininiyu Yesu i wininimac. Anutu imi mériaŋ miŋina eŋeyanec momacguc, héŋgaleŋ miŋina, ic kewu ionac ic kewugina, miŋ kewu ionac miŋ kewugina wanzac. ¹⁶Iwarunec sac humuc ménda hezac. Inéŋ edamuya hosucgéwiŋac séc qahac imuhucya qeriaiguc kecanzac. Waŋu méŋnéŋ ménj ménda héŋec. Waŋu héhéŋawac séc qahac. Iwac muru eebipiya zéma kuc tetcgia qahac hema kecmac. Hélacnec!

¹⁷Gi imi baec yomuac naléiguc soukiwaginaguc keczu ionac yomuhuc zéseli énécmiwésémaŋ, Ewa qerigina memaamuma hinac qahac wawaŋa imuac qahac, néŋ ségiségi mihicŋi nénécmimaŋ zé iwawai moczoŋ sécnina ogicma nénécmianzac Anutu iwac muru mia niŋkumugina haimu. ¹⁸Haka hiabia sasala waŋgic, wawaŋa meme hiabianéŋ kekecginaiguc sécgé énécmiyu efima siŋa nimma tosara haleŋ sécgina haihulac waŋ énécmimu. ¹⁹Imuhuc wamma hofi ama hélaiguc iwawai eeyaguc haigic eŋu iminéŋ kurumeŋac nalé hahaya imuaru qambaŋgina waŋu kekec héla aŋgéŋ timu.

²⁰O Timoteo qutuŋgé géŋgéŋa imi galeŋgéma késa kecma niniŋ héla zéanzu, néŋ niniŋ ikora wanzac, baecac ac eŋomia houhouya zéma andé qeqe ac imuac mia andé qema kecbésémaŋ. ²¹Ic tosanéŋ ac imuhucya nesima kemma ninzéŋ ninzéŋ waima rouc wamma keŋha waŋanzu.

Ewa hianéŋ iniguc hema kecmac.